

## Emm Schorsch soi Idee iss gut

Wennde Schorsch sisch ebbes in soin Kobb gesetzt hott, donn giehts su schnell nitt außem enaus. Unn dessdeweese wollderr joo, noochdem er sisch alls iwver die Altstadt unn iwver die Parkplätz Gedonke gemacht hott, e Modell baue unn dess soll zeische wies gemacht werrn soll, wennmerr kaum noch in de Stadt parke kann. Omm Sunndaach hotter zum Stommdisch nitt soi Modell, awwer e Zeichnung mettgebrochd. Onn dem Moie war aach unsern ahle Kumpel Hubert widder emol dabei, weil der bei soim friehere Nochber war, der enn Daach devor Achdsisch worrn iss.

De Schorsch also hott soi Zeichnung uff de Disch geleeschd unn hott uns oogeguggd. Mir gugge uff dess Blatt Babier unn was sehn merr doo? Flerschem vumm Moo bis hie zu de Kolonnade unn aach drei Terrm, ooner omm Moo, de onner omm Marienplatz, also dem Norma-Parkplatz, unn de onner onn de Kolonnade, unn die drei Terrm werrn mettere Kabinebohn verbunne.

Guggd eisch dess genau oo, hott de Schorsch donn gesaad, isch stell merr dess su vor, dass in jedem von dene Terrm enn Uffzuuch iss, owwe giehts donn direkt in oo vunn dene Kabine enoi, unn wenn die oone mett so ooner Kabin vumm Moo iwver die Owwermooostrooß schwewe, kimmt die onner grad vumm Marienplatz uff de Moo zu. Die uffem Marienplatz kenne donn aussteihe unn mettem Uffzuuch de Torm enunner zum Norma fahr, unn die onnern fahrn weider naus bei die Kolonnade, hoch iwver die Bohngleise unn iwver die Heiser in de Wickerer Strooß. Dess Gonse funktioniert ohne Fahrer, dess gieht alles audomatisch, wennde unne irschendwo doi Kart gezooche host, konnsde fahrn. Die Terrm hawwe de Vordeil, dassde hoch genuch enuff kimmst unn dass aach Leit, die sunnst mettem Rollador die schebb Owwermooostrooß enuff unn später widder enunner fahrn missde, vumm Moo in die Kolonnade kumme. No, was duden ihr vunn moine Idee halle?

Isch war genau su wie aach de Karl sprachlos, doodeferr hott de Hubert, noochdem der sisch die Zeichnung gons genau oogeguggd hadd, gesaad: Georg, mein Freund, was hast du denn hier wieder gemacht. Du weißt, dass so etwas nie und nimmer realisiert werden kann, das ist einfach zu teuer, aber eines hast du damit bezweckt, die Leute darauf aufmerksam zu machen, dass der große Parkplatz am Main nicht in der Lage ist, die Probleme mit der Wickerer Straße zu lösen. Wenn es nicht gelingt, in der Nähe der Geschäfte dort ausreichend Parkplätze anzubieten, wird die Stadt dort ihren Atem aushauchen. Und schlussendlich wird die Stadt über der Bahn nur eine Einkaufsmeile mit angeschlossenen Schlafräumen werden.

Endlich hott aach de Karl soi Sprooch widder gefunne. Dem Schorsch soi Idee iss su gut, die muss umgesetzt werrn. Dess Gonse kost halt Geld, isch waaß, awwer ess deet e Attraktion gewwe, doo käme die Leit vunn Fronkfort unn vunn Wissbade mettem Schiff hierher unn deede sisch dess oogugge unn aach mett de Pendelbohn fahrn, unn e bissi später deet Flerschem dorsch su e Bohn in de gons Welt bekonnd werrn.

Unn isch saach: Ja, Schorsch, dess iss gut dassde su e Zeichnung gemacht host. Jetzt kann unsern Beiemosder unn aach de neie Stadtrat die Idee uffgreife unn duns doodemett su emm Investor leichter mache, in unser Stadt ze invesdiern. Weils donn nitt nor haaße dut, Flerschem, dess iss die Stadt mettem Fluchlärm, naa, dess iss die Stadt mettere Pendelbohn, unn werklisch, ihr Männer, dess kennt donn aach noch onnern Städte druff uffmerksam mache, dass die Zukunft in de Luft lieht.

Und dann noch ohne ein einziges Flugzeug, hott de Hubert gesaad. Eiern Honnes